

**Nuutsbreef , april/mei 2023**

Bèste Veldeke minse,

**1. Bezeuk Echter Revue**

72 leje hòbbe zich aangemeldj en betaaldj óm mit te gaon nao de Echter Revue ónger d'n titel: "Ech, d'n draod kwiet". Hievan krig g'r gein berich mieë; de kaertjes ligke väör uch klaor bie de Veldeketaofel aan de ingank van het EuroDetach theater. Die tickets zeen ouch door VKE al betaaldj; trök betale bie verhinjering – ouch door krank zeen – is neet mäögelik. G'r këntj in zo'n geval waal eur plaats doorgaeve aan emes anges. Laot det den vööraaf waal wete: [info@veldekekrinkech.nl](mailto:info@veldekekrinkech.nl). Tösse kwart op 5 en kwart väör 6 këntj g'r eur kaertje aafhaole. De vöörstèlling begintj óm 18.00 oer!

**2. Limburgdaag op 19 april**

Same mit Veldeke Belsj organisere weer op woensdag 19 april de Limburgdaag. Dae daag begintj en eindigtj mit 'n officieel gedeilte: in Maaseik en in Roostere. Väör deilname dao aan hawtj g'r uch kenne opgave, wie in Veldeke Bekèt gemeldj is gewaesj. Det kan noe neet mieë; 't maximum aantal van 100 deilnummers is bereiktj.

Waal de activiteite aan de Pater Sangersbrök kónne, zónger opgave vööraaf, bezóch waere: aan de Roosterder kantj. Dao is de samekómst op de klein parkeerplaats, rechs van de brök. Hie ouch weer 'n kort programma mit meziek en vöödrach van zoaget 15.45 - 16.45 oer.



Woróm dit alles? De Veldekekringe en de gemèndjebesturen van Maaseik en Ech-Zöstere wille de culturele verbónjeheid van de beide Limburge óngerstrepe en daomit 't belang van de brök. Ein gooij verbènjing is belangriek óm 't contact äöver en weer mäögelik te make.

### **3. Dialek in 't óngerwies**

Op woensdag 10 mei organisere w'r 'ne thema-aovendj "Limburgs dialek in 't óngerwies". Deze aovendj is bedoeldj óm informatie te gaeve äöver de status van 't Limburgs in 't óngerwies. De praktijk van vandaag en nuuj initiatieve kómme aan bod. Daoväör zeen versjillendje spraekers oet 't óngerwies – van peuterspeelzale tót en mit de PABO - bereid gevónje get te kómme vertèlle en/of te laote zeen. Teves kènne vervolgsteppe bespraoke waere óm 't dialek in 't óngerwies in oos regio 'ne impuls te gaeve. Daoróm zeen naeve de Veldeke-leje och óngerwiesprofessionals en -bestuurders, beleidsmitwirkers, lokale politici en anger geïnteresseerdje oet de gemèndjes Ech-Zöstere en Maasgouw van herte welkom.

Ouch Rob Benders, de nuje functionaris van 't Hoes zal aanwezig zeen.

***De thema-aovendj is vanaaf 20.00 oer in de Peijerhaof.***

### **4.Waem wiltj mit väörlaeze?**

Kómme w'r net 'n bietje op gang mit 't Limburgs väörlaeze in de bieb – per kieér zoaget 5-8 kènjer - kriege w'r te make mit 'ne taegevaller: 2 van de vriewilligers zeen oetgevalle, ómdet ze krank zeen. Det geuf 'n extra belasting väör de angere. Waem zoe wille kómme mithelpe? Oetgangspuntj is 2 x p'r jaor aan de bäärt, op de 3<sup>e</sup> maondaag van de maondj. Bie interesse of vraoge num contact op mit Magna via [info@veldekekrinkech.nl](mailto:info@veldekekrinkech.nl)

*Vruntjelike groete names 't bestuur,*

*Ton van Wegberg*